

25 MAY 2002

DR MAHATHIR HARAP SASTERAWAN PROAKTIF

KUALA LUMPUR, 25 Mei (Bernama) -- Datuk Seri Dr Mahathir Mohamad berharap sasterawan di negara ini dapat memainkan peranan proaktif dengan menyedarkan masyarakat mengenai pentingnya memelihara perpaduan dan keharmonian di kalangan rakyat.

Menurut Perdana Menteri, peranan itu dapat dimainkan melalui karya-karya yang dihasilkan oleh mereka.

Dengan berbuat demikian mereka akan dapat membantu untuk memakmurkan dan memajukan negara, katanya dalam buku cenderamata sempena Hari Sasterawan Tamil Malaysia 2002 yang disambut di Pusat Dagangan Dunia Putra di sini hari ini.

Hari Sasterawan Tamil yang disambut buat kali kelapan, dianjurkan oleh Persatuan Bharathidasan Malaysia yang diketuai oleh Datin Seri Indrani Samy Vellu, untuk memberi penghargaan kepada sasterawan yang telah menyumbang dengan cemerlang kepada kemajuan sastera Tamil.

Lebih 2,500 peminat sastera menghadiri sambutan itu hari ini yang turut diserikan dengan persembahan muzik, debat dan penyampaian sajak dan puisi.

-- BERNAMA

RV RV MAI